



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Kadhe-Rithvik nati mezungbuba ATP Tour title ka benogo

Indonesia Tir Prabowo-i ochimashi inyakyim anema raratsü nangzük



VOL. XXII ISSUE NO. 12 (ADOK 12) DIMAPUR TENTONÜ (MONDAY) MONGPUTENI (OCTOBER) 21, 2024 ₹ 5.00

Nagaland nung JJM kübok Rs. 1,712 crore tim mesüi amshiogo

Dimapur, October 19, 2024 (TYO): Nagaland nung Jal Jeevan Mission (JJM) kübok Rs. 1712.03 crore tim mesüi amshiogo ta Nagaland Transparency, Public Rights Advocacy & Direct Action Organisation (NTPRAPAO)-i tai tongloksüogo.

NTPRAPAO-i Chief Minister Neiphiu Rio dang iba ken o bushisüngdangtüsü atema Special Investigation Team (SIT) ka tentetsü mepishiogo.

PHED Nagaland kübok senotsü tim mesüi amshiba bushisüngdang tenzüksü atema anogo 30 züngzüksür ta parnokishi.

Nagaland sorkari iba mapa meinyakra PHED minister Jacob Zhimomi-i mapa nungi sodi magi tashi NTPRAPAO-i public anir lungkak aittsü ta metetdaksüogo.

Nagaland nung kilen 3,63,461 lir aser iba nungi household tap water supply coverage kübok kilen 3,35,212 (92.23%) lir ta October 2024 nung sorkari metetdaksüogo.

Iba atema NTPRADAOKetdangpurtemi telung nung Nagaland kübok district 16 nung JMM kübok adenba yimtsüngtem nung bushisüngdanga aser tesemtem asadanga senzüdang tim masüba putetogo.

Deputy Chief Minister Y Patton'er Old Riphym yimtsüng nung functional household tap

connection (FHTC) agüja mali aser water tanks ajak kanga mejungi yangluba aser central guidelines matongba bushitetogo ta NTPRADAO-i ashi.

"Ajisüaka taoksatsüka Old Riphym village nung VC chairman aser WATSAN chairman ajanga Old Riphym nung tap water supply angur ta Utilisation Certificate (UC) agütsüogo. JJM kübok yimtsüng aika rongnung tim mesüi inyakba mapatem rongnung iba ya ka lir" ta parnokishi metetdaksü.

Yimtsüng aser kilen teimba kanga nung "potable pipe water" mali aser yimtsüng kar nungbo water pipes agütsü saka JJM guidelines nung aliba ama mesüi kanga pilar enoka lir. Külen, JJM engineering guidelines nung aliba ama masü water tanks meyirjang aika kanga mejungi yanglua lir" ta NTPRADAO-isa ashi.

Yimtsüng kar nungbo tanks aser pipelines tejentem sayua senotsü tim mesüi amshiogo aser water pipelines kilometer aika meinoki liaka WATSAN committee aser PHED ketdangsurtem yaritepa senotsü agizüka agiogo ta parnokishi metetdaksü.

NTPRADAO-i Chief minister dang SIT ka tenteta bushisüngdang asüba dang masü saka PHED department nung tim masüba inyakyim atema CBI aser ED nem bushisüngdang südaktsüsü shiogo.

New Delhi nung 3 buba Autumn Festival takok ngua mongogo



October 2024, 2024 nü Nagaland House, New Delhi nung Autumn Festival tembangba sentong nung adenertem kar agiba noksa nung angur.

Dimapur, October 20, 2024 (TYO): October 20, 2024 nü Nagaland House, New Delhi nung 3 buba Autumn Festival tembangogo.

Anogo asemnü benjungmong ya October 18, 2024 nungi tenzük aser iba mapang capital region nung alir Naga nung, tetushi süa jaokertem aser Delhi nung temeimertemi shilem agiogo.

Autumn Festival ya 25 buba Hornbill Festival 2024 ayongzükba sentong ka lir.

Iba benjungmong tembangba sentong nung Additional Secretary, Higher Education, Government of India Sunit Kumar Barnwal aser Director British Council Alison Barrett na

tetushi süa jaokertem ama shilem agia liasü.

Iba benjung atema Tourism and Higher Education Minister Temjen Imna Along-i chief host aser Resident Commissioner, Nagaland House, New Delhi Wennyei Konyak-i host ama shilem ketdangsüa agiogo.

Sentong nung Delhi Eastern Nagaland Students' Union, Naga artists Shelao Kheang, Phelao, Samuel aser DGP Band nungeri shlem agi.

Advisor to Chief Minister & Chairman IDAN Abu Metha-i benjung tanabuba anogo nung o jembidang Naga nung aser Nagaland medemertem den külemi shilem agiba aser

sensaksemtsü mapang anguba atema pelar ta shia liasü.

Paisa lanurtem dak sempet aliba atema pelaba metetdaksü aser temeimertemi 'Nagaland Experience' nung shilem agiba atema pelaba shisem.

Minister Temjen Imna Along lenisüba kübok Nagaland Tourism aser Wennyei Konyak lenisüba kübok Resident Commissioner's Office ajanga Autumn Festival takok ngua amongba atema tenüngsang agütsür ta Abu Mehta-isa ashi.

Iba benjungmong nung Runway India, Ukrü Crafts, Kinte, Nagaland State Rural Livelihood Mission kübok 'Women Folk' teloktemi shilem agia liasü.

SAYO-i National Highway-2 nung gari tulutem noktanger



Kohima nungi Imphal lenmang nung SAYO volunteers-i gari tulutem noktanga ayuba angur.

Kohima, October 20, 2024 (TYO): Nagaland state sorkar nungi telangzüba tajung manguba atema Southern Angami Youth Organization (SAYO)-i National Highway-2 Kohima nungi Imphal lenmang nung 3 axles (above 10 tyre) tema garitem senzüba noktangtsü tenzükogo.

"SAYO-i October 4, 2024 nü Deputy Chief Minister nem anogo 15 tsünga lenmang yanglushitsü mapang züngzüksü saka telangzüba kecha maliba ajanga iba mapa tenzük" ta SAYO president Metekhrielie Mejura-i ashi.

"SAYO ketdangsurtem aser volunteers-i tanü nikongdang 5:00 ako nungi 3 axles tema garitem senzüba noktanger kechiyong item gari ajanga lenmangtem raksatsür" ta

Metekhrielie-i ashi.

SAYO-i old check post Phesama aser inter-state boundary Khuzama check gate nung volunteers yuja lir.

"Tang tashi nung gari 35 sota lir aser volunteers dang Hornbill Festival atema Kisama-i khu bener aoba garitembo menokdangtsü tetuyuba agütsüogo" ta paisa ashi.

SAYO-i two-lane road yanglutsü aser Mao gate tashi NH-2 Kohima tajungba küma yanglushitsü mapang züngzüksü ta SAYO president-isa ashi.

"Onoki state sorkar ajanga tesüiba nung pezüben tashi Central government, Ministry of Road Transport and Highways dang mepishiogo" ta paisa shisem.

Mezungbo iba lenmang ya 4-

lane yanglutsüba liasü saka technical reasons ajanga 2-lane aküm. Ajisüaka 2-lane meyanglur aser tang aliba lenmang anepalu masür, ta Metekhrielie Mejura-isa metetdaksü.

Gari lenmang nung auyi agi timtemba dang masü saka lenmang majungba ajanga gari lendongtem kanga ataloker. Lenmang tamajungba makümtsü aser nübertem tiptema senzütsü atema gari tulutem noktanger, ta paisa ashi.

"State sorkari telangzüba magütsü nunga mapa kar tenzükogo saka iba nung onoki temulung masür. SAYO-i state sorkar anema noktanger masü saka nübertem timtem aser khurettem asoshi sorkari mapa inyaksüla" ta SAYO president-isa metetdaksü.

Rongmei nungeri Zeilad Wildlife Sanctuary nung oil exploration magizüker

Imphal, October 20, 2024 (Agencies): Manipur kübok Tamenglong district nung Naga nung telok kati Zeilad Wildlife Sanctuary nung oil and gas sentong anema noktanger.

Nübertemi anema noktakaka Union Environment Ministry panel-i iba mapatong atema Stage-1 clearance mulunga agizükogo.

Iba sanctuary nung shiruru aika lir aser iba tesem nung awatsüng tulutiba Zeilad Lake lir.

Rongmei Naga Council Manipur (RNCM)-i Zeilad Wildlife Sanctuary aser Zeilad Region nung oil and gas exploration mesüdaksütsü ta metetdaksüogo.

Iba mapatong ajungketba kija aser teloktem ya kin anema inyakerem ta züngshitsü ta parnokishi metetdaksüogo.

Iba mapatong ajanga Indian Constitution nung Arla 371 (C) nung lateta aliba ama Manipur nung tenemlen aliba lisopurtem kümzüka ayutsü lateta aliba anema lir ta RNCM-isa metetdaksüogo.

Zeilad Wildlife Sanctuary nung oil exploration asütsü mapa ajanga lipoküm wazüka ayutsü

merangertem aser lisopurtemi tebilemstü abenba metetdaksüogo.

Taoba hopta Zeliangrong United Front (ZUF)-ia Zeilad Wildlife Sanctuary amenoktsü atema No Objection Certificate (NOC) ka prokshiba ngua aoksaba aser aitsüba metetdaksüogo.

Iba NOC ya NSCN-IM ddeputy ato kilonser Lt Gen (Retd) VS Atem-i August 24 nü agütsü. NOC nung ali kiburtemi tentetba telok tenüng nung Nehemiah Pannmei dangi Zeilad Wildlife Sanctuary amenoktsü atema shia lir ta ZUF-i ashi.

Maneni, Zeilad region nung kilonser Lungchaibi Gonmei dangi authorisation letter ka züluba nung iba sanctuary renlokba mapa repringtsü aser oil exploration atema seismic survey operations asadangtsü shia lir ta ZUF-isa ashi.

Zeliangrong nung ali nung tatemtsü tajung aser o tajung jembia wildlife sanctuary atema NOC agütsüba ya Zeliangrong nung ali aser rongsen temeten agienba lir. Iba ajanga Naga nung tsünga mepetmesü adoktsü aser tensa mejungi akümtsü akok ta parnokishi ashi.

Dimapur nung Langpangkongtsür telungjem tentet



Dimapur nung Langpangkong Watsü Telungjem tentetba mezüing lokti senden sentong nung ketdangpurtem aser Merangkongtsürtemi ken atenba noksa nung angur . (October 19,2024).

Dimapur, Oct.20 (TYO) : Dimapur nung longjemer mapa tajung inyaktüsü nukjidong nung Dimapur Langpangkong Watsü Telungjem (DLWT) tentetogo aser iba tentet mezüing lokti senden sentong ka October 19, 2024 nü Lengrijan Council Hall

nung takok ngua agiogo. Iba lokti senden sentong nung “ Nükmen Mejimiba Tetsür” onük nung Watsü Alemla Samuel-i jembia liasü aser Dimapur Langpangkong Senso Telungjem nung tir Wb.C.Yapang Pongeni

tajungshi o jembi aser Dimapur Watsü Telungjem nung tir Wt. Aoinla Jamiri tepela o lemsatop. Iba kasa sentong nung Dimapur Merangkongtsür Telungjemi temeja ken ka “ Arung, Langpangkongtsürtem Telungjem nung asen lima

asoshi inyakdi,” ta asüba ken agi telok mulung ayongzüka liasü. Iba senden nung Dimapur nung alir Langpangkongtsür yimtsüing shia nungi teshimtetpurtem longsulongua arua denogo. DLWT nukjidong ya ‘Telungjem ajanga Terenlok’

asütsü lemtetogo aser iba telungjem nung mezüing ketdangpurtem rongnung tir Wt.Aienla Jamir, Tatong tir Wt.Alemla Imsong, Tongti zülur Wt. Amongla Imsong aser Repsem zülur Wt.Anungla Jamir nungertem shimteta lir.

Thoubal nung telungpur atsükshiba tesem ka ngutet



Imphal, Mongputeni/Oct. 20 (Agencies): Manipur Police aser Assam Rifles tem lungjemer operation ka agidang Thoubal district nung telungpur atsükshiba tesem ka nguteta amak.

Iba operation ya Nongpok Sekmai anasa Irong Hill range nung Honibarnep agia liasü aser iba mapang nok-nü aser tapoktsü oset aoka ngutet. Police ajanga ashiba agi, sepai telok ana dang telungpur

aliba indang itdangiter nungi osang arua liasü aser mapang meindoki mera agi. Parnok iba tesem tonga aodang prangbong bona alirtemi nok-nü aika yutsür jena ao. Iba mapang sepaitemi 9mm pistol ka, China nungi bener aruba grenades pezü, injang 12, detonator ka, magazine tazüingla pezü, smoke grenade ka, 38mm anti-riot cartridge ka den rubber bullet, stinger cartridge ka aser fix-fired cases tem nguteta liasü. Item nok-nü aser hadir tem ya maneni bushisüingdanga ozüing agi melaba maparen inyaktüsü atema Nongpok Sekmai police station nem agütsüogo.

Lasumi VC & VDB ajanga tenüngsang agütsüba sentong ayongzük



Lasumi yim dak UPSC, NPSC aser NSSB nung takok angurtem aser yimtsüing nungi lenirtem külemi tangokba noksa nung angur.

Kohima, Mongputeni/Oct. 20 (TYO): Lasumi Village Council aser Lasumi Village Development Board lungjemer UPSC, NPSC aser NSSB nung takok angur tem tenüngsang agütsüba sentong ka October 19, 2024 nü Phek district kübok Lasumi yimtsüing nung ayongzüka liasü.

Kromi, chairman, Lasumi Village Council ajanga tenüngsang agütsüba o jembi. Iba sentong nung Lhiwekulo Marhu, president, Western Lasumi Union Dimapur menden liasü aser Senokhape Chirie, pastor, CRC Lasumi ajanga Tsüingrem temoatsü meshia sarasadem, Wepre-ii Therie aser Neilo Rabvo, Head GB (Incharge) nati temeja ken aser sobaliba ken aden.

Neingulo Krome, Secretary General, Naga People's Movement for Human Rights (NPMHR) ajanga lokti den tajungshi o jembia liasü. Sentong nung Mezivolu T. Therieh, Principal Judge, Family Court Kohima ajanga takok angurtem tenüing nung jembia liasü aser Lhiweshelo

Maneni Kukhro Therie, Secretary VDB Lasumi lenisüba nung tenüngsang aser tetushi agüja liasü aser Tsiilo Therie-i sarasadema sentong tembang.

Socunoma yim dak agri credit indang awareness agütsü



RBO Regional Manager, Hubert AS Wungshim ajanga October 19, 2024 nü SHG züingsem nem sanction letter amoktsüba mapang tangokba noksa nung angur.

Dimapur, Mongputeni/Oct. 20 (TYO): Socunoma Village Council Hall nung October 19, 2024 nü agriculture awareness cum credit camp ka SBI ACB Medziphema Branch ajanga ayongzüka liasü.

sendaktepba ajanga tetsür timba aliba SHGs temi kanga junga mapa inyaktar, ta lai ashi. RBO Regional Manager Hubert AS Wungshim ajanga iba sentong ayongzüka nukjidong lemsatopba mapang agri sector tajungba kumdaktsütsü asoshi aluyimer temi modern technologies aliba nung agricultural finance ajanga tongti shilem agiba indang shia liasü.

züingsemtem nem sanction letter amokja liasü. RBO Deputy Manager Paotingul Hangsing ajanga SHG nem KCC loans agütsüba indang rasaa ashi aser RBO Manager FI, TLhingneikim ajanga financial literacy indang jembia liasü. Sentong tenzüka Thongkholun Khongsai, Branch Manager, ACB Medziphema Branch ajanga tarur pela agizükba o jembia liasü.

Iba sentong nung Medziphema kübok yimtsüing 7 nungi Self Help Groups züingsemtem aser aluyimer tem dena liasü. Socunoma ya SHG atema model village ka lir, kong SHG züingsem 12 shi parnok business kanga junga inyaktar, ta NSRLM AC SISD BMMU, Medziphema, Kedale-i ashi. Tesüiba küm tenet tashi NSRLM aser model village

Financial discipline anepalutsü kanga tongtipang lir, ta Wungshim-i ashi aser shilem agirtem dang aluyimer yaritsü SBI teti renema lir ta metetdaktüsü. RBO Chief Manager Credit Rapi Pao Poumai ajanga SHG

Iba sentong nung KCC, Animal Husbandry and Fisheries, PMFME, PMMY aser PMJBY, PMSBY aser APY ama social security schemes indang onüktem nungi jembia liasü.

Tawang nung high-altitude marathon ayongzüktsü



Tawang, Mongputeni/Oct. 20 (Agencies): Arunachal Pradesh kübok Tawang nung October 24, 2024 nü 2nd Tawang International Marathon ayongzüktsü maparen ajak renema lir. Iba sentong ya United Nations Day den indangteper, koba October 24, 1945 nung United Nations tentetba

anogomung küm shia amunger. Tawang International Marathon, koba dang 'queen of high-altitude runs' ta ajar, aser iba sentong ya Indian Army aser Arunachal Pradesh sorkar lungjemer civilian aser mitkartem tsüingta tesendaktep akanga aliba alima dang sayutsü nukjidong nung ayongzüker.



October 20, 2024 nū Rajasthan kübok Beawar nung Right to Information (RTI) Museum semzükba sentong nung National Federation of Indian Women Tir, Aruna Roy aser taoba mapang Supreme Court nung judge, Justice Madan Lokur aser tangartem tangokba nonung angur.

Wayanad nung Navya Haridas-i Priyanka Gandhi Vadra den tokteptsü

New Delhi, October 20 (Agencies): Kerala state kübok Wayanad Lok Sabha menden atema by election agitsü, aser iba election nung Congress lenir, Priyanka Gandhi Vadra den toktepdaktsü atema BJP-i Navya Haridas tenüng sangdongogo.

Wayanad nung Lok Sabha by election ya November 13 nū agitsü aser November 23 nū vote zünga osang sangdongtsü. Arrshi küm 39, Navya Haridas ya Kozhikode Corporation nung anaben tashi councillor inyakogo. La ya yangji BJP parliamentary party lenir lir.

La ya BJP Mahila Morcha nunga state General Secretary

Haridas-i KMCT Engineering College nung Mechanical Engineering nung BTEch degree angu. La dak technical shisatsü aliba den külemi la yimtenren nunga tera-yanga lir.

2021 küm mezüing lai Kerala assembly election nung Kozhikode South menden nungi toktepa liasü saka Congress candidate, Ahammad Devarkovil matsüngdang tamakok angu.

Wayanad by election atema BJP-i la shimba sülen lai, Wayanad nung terenlok kanga nüngdaker; Wayanad nung mapang talangka Congress MP liasü saka Congress-i

nüburtemi imlaba ama meinyak, ta tai tongloktsüogo.

Wayanad Lok Sabha by election nung tokteptsü atema Left Democratic Front (LDF)-ia Communist Party of India (CPI) nung lenir, Sathyan Mokeri tenüng sangdongogo.

Taküm Lok Sabha election nung Congress lenir, Rahul Gandhi-i Kerala kübok Wayanad menden aser Uttar Pradesh kübok Raebareli menden naprongla nung toktep aser menden anaprongla nung takok anguba sülen pai Raebareli menden shimmer Wayanad menden toktsüba ajanga iba menden tazüing küma by election agitsüsa aküm.

Yipru mopung tesashi ajanga Odisha aser West Bengal kongshitsü

Bhubaneswar, October 20 (Agencies): October 23, 2024 anogo tashi nung Bay of Bengal nung yipru mopung tesashi kümteptsü aser iba yipruji ajanga Odisha aser West Bengal nung tzüyimkümlen aliba tesemtem kongshitsü, ta Amongnü IMD-i metetdaktsüogo.

Andaman Sea nung yipru mopung tesashi ka kümteptdar aser taruba ghonda 24 tsüingda ibaji ajanga Bay of Bengal nung low-pressure area ka tentettsü, ta IMD-i metetdaktsü.

Iba yipruji west-

northwestwards tsütsüleni aotsü aser October 22 anepdang tashi nung yipruji ano tesashiba akümtsü aser October 23 tashi nungbo east-central Bay of Bengal nung cyclonic yipru tesashi akümtsü, ta parnoki metetdaktsü.

“Iba sülen yipruji northwest tsütsüleni aotsü aser October 24 anepdang tashi nung Odisha-West Bengal tzüyimkümlen atongtsü,” ta IMD-i metetdaktsü.

Iba yipruji ajanga October 23 nungi 25 tashi Odisha aser West Bengal tzüyimkümlen tzünglu

kanga sashia arutsü, anungji angopurtemi October 21 tashi nungbo tzüyim nungi meyipa arutsüla, ta IMD-i tekümdangtsü metetdaktsüogo.

IMD Director-General, Mrutyunjay Mohapatra-i, “Tzüyimkümlen tesem kar nungbo October 24-25 anogotem nung tzünglu 20 cm tashi arutsü. Tesem kar nungbo tzünglu 20 cm nungi 30 cm tashi arutsüa akok,” ta metetdaktsü.

West Bengal aser Andhra Pradesh nunga tzünglu arutsüa akok, ta IMD-i metetdaktsü.



October 20, 2024 nū Varanasi nung RJ Sankara Eye Hospital semzükba sentong nung adentsü atema Ato kilonser, Narendra Modi gari nung arudang loktii pa agizükba noksa nung angur.

Maharashtra assembly election atema BJP-i candidate 99 sangdong

New Delhi, Mongputeni/October 20 (Agencies): Amongnü Bhartiya Janata Party (BJP)-i Maharashtra assembly election atema tang mezüngbuba shilem nung candidate 99 tenüng sangdongogo; tang Deputy Chief Minister teinyakdak, Devendra Fadnavis-i Nagpur South West menden nungi tokteptsü aser BJP State Tir, Chandrashekar Bawankule-i Kamthi assembly menden nungi tokteptsü.

Maharashtra nung Mahayuti teloktepi menden 260 nung tokteptsü atema Union home minister Amit Shah'er kidang lenirtem senden amen aser Honibarnep ang senden tembanga liasü.

Iba teloktep nungi lenirtemi

BJP-i menden 155 nung tokteptsü, Shinde-i aniba Shiv Sena-i menden 85 nung tokteptsü aser Ajit Pawar-i aniba Nationalist Congress Party (NCP) nem menden 45-50 shi lemzüktsütsü atema telemtetba agiogo.

Taoba assembly elections nung 2014 küm BJP-i menden 260 nung toktep aser menden 122 nung takok ngua liasü. 2019 küm election nunga BJP-i menden 105 nung takok ngua liasü.

Election Commission of India-i Maharashtra nung Assembly elections November 20 nū agitsü aser November 23 nū vote azüngtsü, ta sangdongogo.

Tang Maharashtra Assembly kümsük ya November 26 nū tembangtsü.



October 20, 2024 nū New Delhi kübok Rohini kiyong nung CRPF school anasa bomb ka apokba sülen National Security Guard (NSG) sepaitemi bushisüngdangba noksa nung angur.

Jharkhand elections nung Cong-JMM-i menden 70 nung tokteptsü

Ranchi, October 20 (Agencies): Jharkhand nung assembly elections agitsü joko mapang ana nung lia JMM tongti aser Jharkhand Chief Minister, Hemant Soren-i, INDIA teloktep nung aliba party temi longjemer tokteptsü; Congress aser JMM nati menden 81 nungi menden 70 nung candidates toktepdaktsütsü, ta metetdaktsü.

“INDIA teloktepi Jharkhand assembly election nung longjemer tokteptsü. Menden lemsar tokteptsü atema jembidang Congress aser JMM nati menden 81 nungi menden 70 nung candidates toktepdaktsütsü atema telemtetba agiogo,” ta metetdaktsü.

Mongolbarnü Chief Election Commissioner Rajiv Kumar aser Election Commissioners ana- Gyanesh Kumar aser Sukhbir Singh Sandhu nungeri osangbenertem senden ka nung Jharkhand nung assembly election agitsü anogotem sangdonga liasü.

Election Commission of India (ECI)-i, Jharkhand nung assembly menden 81 atema election ji shilem ana lemsar November 13 aser November 20 anogotem nung agitsü aser November 23 nū vote azüngtsü, ta sangdongogo.

State nung vote agütsütsü temsüa alir crore 2.60 lir, aser iba nungjagi tang mezüng vote

agütsütsüpur lakh 11.84 lir aser persons with disabilities (PwD), third gender aser arrshi küm 85 ser temapur voters lakh 1.13 lir, ta metetdaktsü.

Chief minister Soren-i sangdong agütsüba sülen INDIA teloktep nung densema aliba party karibo mepelaba osang lemsatepogo.

RJD otongdar, Manoj Kumar Jha-i, “Onok nem lemzüktsüba menden agi onok melung masüba onoki metetdaktsüogo, kechiyong parnoki dang telemtetba agi,” ta metetdaktsü.

Paisa, “Onok denbo kecha melemsatep, anungji onoki tanga telemtetba agitsü akok,” ta ashi.

Paisa, RJD-i Jharkhand nung menden 15 nungi 18 tashi nungbo BJP candidates tamakok ngudaktsütsüsa lir, ta pai ashi.

Ano külen BJP-i aniba National Democratic Alliance (NDA)-ia party tem tsüingda menden lemsaba osang metetdaktsüogo. Jharkhand nung Soren-i aniba sorkar atsüngdoktsü nükjidong nung BJP-i menden 68 nung tokteptsü, AJSU Party-i menden 10, JD(U)-i menden ana aser LJP (Ram Vilas)-i menden ka nung tokteptsü.

Honibarnü BJP-i candidate 66 bo sangdongogo aser parnok rongnung state party Tir Babulal Marandi aser taoba mapang chief minister Champai Soren nata densema lir.



TIR YIMYIM YIMOBILEM (EDITORIAL)

DIMAPUR TENTONÜ, OCTOBER (MONGPUTENI) 21, 2024

Tekümküm nübortem

Asenok ama alima tila nung alir sensakertem aser mapa meinyaki manger sangwa nung takar kümnertem aliba lima nung alirtem asoshi kanga nungdakbaji kati ka mita alitsüba ya asütsü. Asenoki angatetsü agi, yangi shinübaji police-temi public anüksüla aser public-temi police anüksüla ta shinür. Yamaji ka mesüra ashiko police-temang ashir auer aser rakzükratemer küma aotsüa akok mesüra nübortem ajungaji ozüng raksar kümadoktsüa akok. Kasaji, yimten nung yimsüsür aser ketdangsertemi nübortem mita reprangtsüla aser nübortemia parnok mapa aser inyakyimji meteta anidaktsüla. Iba amaji ka mesüra, ashiko, yimsüsür aser ketdangsertem jagi alima nunga 'public'-bo kata mali amato tenük amur inyaksüa akok mesüra nübortemia yimtena mali amato pei inyaknüsü inyaka aotsüa akok. Timtemji yang nung jagi tenzüker aser lendongji yangji lir. Iba bilemdanga asen lima nung tanü atalokba mapatem reprangdangra, yashiang ULB election agir tesem ajaklen Municipal aser Town Council tentetogo. Ajisüaka, tanübo Dimapur nung dena bengana 'wholesale' ayoker dang nungi bengana seret shia sen asemsem luzüka agiba angazüker. Ano, Kohima nungbo KMC pur kiojen atema nungdak nung agütsüba sen agi gari-ang alia ta tangar masü saka yimsüsüri mepelaba ken o lemsatepba asenoki angashiogo. Ano, PHE department nungbo center government nungi Nagaland nunga kibong shia tzü tajemtsü pipe agi tonga bener arutsütsü atema 'Jal Jeevan Mission' sentong ajanga yokba sen mashimashi amshiogo ta lokti tentet kati aitsüba angashiogo. Itemji asen yimten nung meshitak, ochimashi aser mashimashi inyakba mapatem aika rongnung tilateri kar temai adoka jembiba ajanga asenoki angashibatem lir. Itemjia, nisung kari lendong timtem aser tetsübu tizükteta yimjak nung mejembi asünungbo, asen temang nung aseni memetet tashidak tulu renloka aoer amai süla. Ibayongji, asen lima tesünep nung topur junga akümtsü atema tuluba-a tilabaa aser takartema aser sensakertema kanga kümküma alitsü nungdaker. Yangi shinüba, tekümküm nisung aser tekümküm nübortem ya pei lima aser pei alidak kechisa ataloker, itemji meteta anidakba nisung aser lokti lir. Item tekümküm nisung aser lokti jagi government kübok department shia nung nübortem asoshi kechi mapa aser sentong atema sen kwi arur, itemji meteta anidaktsü. Item tekümküm nisungtem jagi shishilembadak jenjang shitak asü masü medemdanga anidaktsü. Aji oda, tatishitsü agi, Nagaland gate atenlibo bengana nung seret nung sen 20 dang meshir saka gate atena aiter Nagaland nungbo seret nung sen 40 meshir ta süra ajia masü. Ajisüaka, item alia achir nübortemi itemji asündangtepa kümküma melira, aji kodaser metettsü ? Iba amaji asenoki memeteti asenoki aonsutsü aser jangotsü ali shia telok teloki meshiba saru menoktsü asoshi asenoki dokan kiburtem nem agütsüdagi ta bilemdi. Saru sarur onsara, kechiyong asenok inyaker chiyongertem dang nungibo meinyak ser saru aser commission agi chiyonger teimba kümogo. Item saruji talirtem dang masü saka tayokertem dang meshir, anungji asenoki memeteter aser tayokertem jagibo saruji menungnangi agütsür, kechiyong parnokbo parnoki agütsüba saru senji enoksemer ayoktsü. Aji oda, shi, ang, jang, bengana, alo aser beas ama aonsutsü seret aser cement bag shia nung underground telok 20-i senpak anana, overground authority ana aseme senpak anana agütsüba ajak den ano tayoker tajangzük senpak ishika enoksemer anogo shia asenoki tayoker nem agütsür. Iba amaji tanü Nagaland yanglusaba nung asenoki shilem agir. Itemji shishilembadak atalokbatem dang lir saka kodang asenoki government inyakyim nung inyaksangshiba bushidangdir, atangji, tatalokba aser inyaksangshiba ajakji tamamangtsüka asütsü. Itemji asenok mekümkümba ajanga lir. Asenok mekümkümba agi tanübo tangar nem asen chisu dena rakzüka bener odaktsür asenok temeyong metepshia kazürtem kümogo.

OLEMSABANG

Aor tejakleni aoba kin ka ama mapa agi inyaka sayudi

~ L. Kika Pongener.

Asen Ao kin pei pei among-sungküm shibanger, yim o yim na tsükchitepa, tekolak leptepa lia aliba, Khristan yimsü agizüka amangba agi nuji kümdaktsüba atema, Ao kin-i Dr. Clark nung American Missionary-tem dang kanga pelatsüla. Ajak dak alia, asen tsürabur shirnoki iba Khristan yimsü agizüka amang parnok dang kanga peladi. Naga nung tangar kintemi asen Aotsür Aor dang 'Samanir' kin ta ajar....Tejakleni aoba kin ta ajar. Anungji asenoki iba tenung tajungji meraketa wazüka yudi. Mezümpur aser tamapur (Pioneer) ta ajaba, naroküm tenung, konang dang nungipo, asenok libaliro mapa agi tatishitsü tajung liteta sayuba-jiang kanga agi tongtipangba sudaktsütsüla. Asen Ao kinji kechisarena ajak nung tangar dang nungi jaklaliro tajungba, libaliro tajungba, taremzük tasüba, tila takümba, ajemalu tasüba, asüküm masüba, ngasangadem masüba, mezümeküm masüba aser ulua mebilemba...Iba amaji tejakleni aoba kin ka ama mapa agi liteta sayutsüla.

Anungji asen Aor tejakleni aoba kin ka amai kechisarena ajak nung aremzüka, ken o-a tangari ter jembira asen-ibo ka dang jembitsüla aser 'Samanir' kin ka ama tangari akümtsübuttsüsa alitsüla. Asen o asen na tsüngda nunga aremzüktepa, yimli sayutepa, kati ka den lenji-i arutepa alitsüla. Ajisuaka, tesasatsüka, tanübo asen Aor 'Samanir' kin to tangari mezüngshitsüsa, tangari aküm-metsübuttsüsa küma-odagi. Otsüla oboula nungeri jembia aruba..."Mezüngbur aser tamapur dakji teti agia yimli alir"...aji kanga shitak lir. Mezümpur/tamapur dakji....Onok sur shiba ...??? Ozü sur shir...???...ta tangar tenuk agi mangu, alima nung asen dang alir amai ulua jembiba aser bilemba...Iba amala shisatsüji malir. Mezümpur/tamapur jagi ken o-a tanü ajung asa-a mejembir, mapa-a tanü takok asa-a meinyaker, saka atasa-a aser aremzüka tarutsü indang bilema jembir aser inyaker, tachi-tajemtsü/taki-tarutsü nunga tangar nem tamasa yimli agutsür. Mezümpur/tamapur jagi ozü lima/ozü lokti dang jungra ni-ang akoksadi ta asür. Mezümpur/tamapur jagi ozü lima/ozü telok raksatsü agibo...Ni-ang takoksa aremdi ta asür.

Anungji asen Ao kin mezümpur/tamapur kin ka amai tambu-su agi azü-azüa alitsüla. Asenoki yamaji litetra tangari asenok dang akümtsübuttsü. Mimchir yimya nung tsüboba ya tapu ana lir, ka jaklaliro, jembishinu, libaliro yimya tajung beshiba ngua tangari akümtsübuba (Respect)...Saka kabo o tesashi/tesepa jembia amokmerenba agi tsübodaktsüba (Fear) ...ta tapu ana lir. Asenoki mezümpur/tamapur kin ka amai jembishinu nunga yimli-sua jembidi, chinung anunga jembidi aser tangar züngshia jembidi. Libaliro nunga sobaliba tajung agi tulu-tila ajak den küsa liromedema alitsü merangdi. Asenoki mezümpur/tamapur kin ka ama tangari akümtsübuttsüsa mapa agi inyaka lia sayudi. Asenoki iba amaji lia mesayutetra asenokji tangar kini nuji makümba kin ka den küsa züngshitsü. Kechiyong mezümpur/tamapur naroküm tenung tajung ya, o agi jembiba agi masü, saka mapa agi lia sayuba agi dang tangari bendanga meteta-adoker.

Asen Aotsür Aor-i kanga junga metettsübaji....Asenok akhidang tangar tenuk melapokdang, mapang ka ita-anu amai sentsüwangshia aliba jenjang nung-to tanü asenok mali....Tanübo asenok lenla ajak nung tangar tesuleni oadokogo. Anungji iba jenjang-to bangküptsü ama jembia meli-li, kechiyong iba putu-to talangka suiadokogo. Jokorla, tanübo aseni metetba amai tangar-ia tonga meteta lir, asen akaba amai tangar-a kar, aseni jembitetba ama tangar-ia jembitetter, asen uluba ama tangar-a tulur lir....Kechiyong asenoki alima nung ya asen dang alir amai bilemer dang ashi....Tangar-a lidar ta metettsüla. Anungji asenok dak ngasangademba, mezümekümba, asükümba, tangar mezüngokba, ulua bilemba....Iba amala shisatsü ya joko endokdi. Aji oda, asen Ao kin tang libaliroba jenjang ya memelenshira, asenok tangari aküm-metsübuttsü aser asenoki tangar talangka memeneptsü. Asenok tejakleni aoba (Forward) kin ka masü, saka tesuleni aoba (Backward) kin ka ama küma aotsü. Anungji asenok mezümpur aser tamapur aser nuji akümba kin ka amai tangari akümtsübuttsüsa mapa agi lia sayudi.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Arogo 4,900-i Zambia nung nisung 731,000 den Khrista osang lemsatep



Love Zambia Festival nung tangokba noksa nung angur.

October 20, 2024: Arogo telongjem sayua Luis Palau Association-i denomination balala nungi Arogo 4,900 den longjemer Zambia kübok yimti pongu nung nisung 7,31,000 den Khrista osangtajung lemsatepogo.

Linük tesem ajaklen agiba evangelistic campaign ‘Love Zambia Festival’ nungji Khristan meyrjang aika nem training agütsü aser nisung meyrjang aika den Khrista osangtajung lemsatep. Anogo asemnü sentongji Zambia yimtiba, Lusaka nung tembanga liasü.

Ita pongu tashi agiba campaign kübok linük tesem balala nung Yisu Khrista osangtajung prok; jail, medical clinics, tetsürtem sentong, sports clinics, school aser sorkar ketdangsertem indang sentongtem nunga Khrista osangtajung lemsatepa liasü.

Mwembeshi Correctional Facility (jail) nung Palau-i tepuokdak alir 1,600 den Khrista osang lemsatep aser parnok 1,098-ibo Khrista nem taküm bendanga agütsü.

Palau-i, “Jail nung alirtemi Khrista osangtajung agizük aser tekülem kentem nung parnoki tsüngsanga liasü. Shidakba agibo jail nung alirtem ya melungsentsü teküprak lir, saka parnoki menürem, asayamenü aser parnok dak tepela liasü,” ta Palau-i Luis Palau Facebook page ajanga metetdaksü.

Love Zambia Festival aser Ministry week nung nisung 374,900 den Khrista osangtajung lemsatep aser nisung 154,600-i Khrista nem taküm bendanga agütsü.

Anogo asemnü Love Zambia Festival nungji osangtajung kentenerem- Don Moen, Pompei, Ephraim, Mag 44, Temwani aser Nathan Nyirenda nungeri shilem agia liasü.

Aonung shia Andrew Palau-i tongti sabang nungi osangtajung lemsatep aser lokti dang Khrista nem taküm bendanga agüjang, ta ayongzüka liasü.

Palau team-i training agütsüba Khristantemi counselling nung yaritepa liasü.

Iba dak alia Bibles for the World-ia Khrista agizükertem nem osangtajung Johan kaket 310,000 aser oshi asem nung Tasen Lai 30,000 lema agütsü.

Lusaka yimti nung ayongzüka sentong nung shilem agitsü asoshi Andrew aser Wendy Palau nati linük 11 nungi sayutsünger 60 dak tali jaoka liasü. Sayutsüngeritemji Palau Global Network of Evangelists nungi liasü. Yimti temeket ajak nung parnoki sayutsüngia jaja.

Zambia nung aliba Arogo meyrjang aika den longjemer parnoki Kalulushi, Mufulira, Chingola, aser Ndola yimtitem nunga evangelistic sentongtem ayongzüka agi.

Love Zambia campaign kübok ano nisung 356,534 den Khrista osangtajung lemsatep aser parnok 66,070-i Khrista sülen anidaksü telemtetba agi.

Zambia nungsa parnoki digital evangelism kübok social

media ads ajanga Khrista osangtajung lemsatep. Palau’s digital evangelism strategy kübok nisung 100,000 den Khrista osangtajung lemsatep aser nisung 20,000-i Khrista agizük.

Item sentong ayongzükertemi ashiba agi, Zambia nung nisung ajak senteper parnok 731,000 den Khrista osangtajung lemsatepogo aser iba nungjagi nisung 240,000-i Khrista nem taküm bendanga agütsü.

Zambia nung aliba Arogotemi Khrista nem taküm bendanga agütsürtem atema ‘follow-up’ sentongtem tenzüksüogo aser Palau Association-i maneni alima tesem balala nung item sentong ayongzüka agitsü.

Palau Association-i Argentina, China, Dominican Republic aser Nevada nunga item sentong ayongzüka agitsü tebilemba lir.

November ita nung reshikangshiba Khristantem atema sarasademtsütsü

October 20, 2024: Khristan organization aikati November ita nung alima tesem balala nung reshikangshi ajangshiba Khristantem atema sarasademtsütsü asoshi ayongzüker.

Tang alima tesem balala nung Khristan million 365-i reshikangshi balala ajangshidar, ta Khristan melungtet telok Open Doors-i metetdaksü.

November ita nung mezüngbuba aser tanabuba Amongnü anogotem (November 3 & November 10) anogotem nung reshikangshiba Khristantem atema sarasademtsütsü ayongzüko. Anogo ana ya International Day of Prayer for the Persecuted Church anogomong lir.

Küm 20 tejaklen New York nung amenoka aliba World Evangelical Alliance-i mezüng iba anogomong ayongzüka liasü.

Ano Khristan melungtet telok Aid to the Church in Need (ACN)-i reshikngshi ajangshiba Khristantem nem teyari balala agüja arudar. Parnoki November 20 nü Red Wednesday amongtsü. Alima

tesem balala nung Khristantem reshikangshiba osang proktsü nükjidong nung 2016 küm ACN-i Red Wednesday ya mezüng ayongzüka liasü. Iba anogo nung Arogotem, school tem aser nijatem dang süoshi sentsü temerem asemtsü ayongzüker.

ACN United Kingdom office-i parnok indang website ajanga, “#RedWednesday nung temerem asema ajanga reshikangshiba maitüsü sayar. Nüburtem dang sarasademtsü aser reshikangshi ajangshirtem bilemtetsü ajangshir,” ta metetdaksü.

Open Doors-i linük 70 nung reshikangshiba Khristantem nem teyari agütsür aser Laishiba lema agütsür. Parnoki ashiba agi, Africa nungbo Khristan 5 shia nungi katibo reshikangshi ajangshir aser Asia nunga Khristan 5 shia nungi anatibo reshikangshi ajangshir.

Tesüiba küm ka kija nunga alima nung reshikangshi ajangshir Khristan million 5 bendenlokogo, ta Open Doors-isa metetdaksü. Tang alima nung Khristantem tamajungba

ANOGO ABEN TSÜNGREM DEN

Nenoki kechi angashir temulung agüjang (Mark 4:24)

Asenoki kechi angashir kümdanga angatsü asoshi Yisui asenok dang tekümdangtsü ashir. Asenok tenarong nungi kechi aiter aji azüoktsübaji asenok mapa lir, aser angashibaji timi amshitsüjia asenok mapa. Azüoktsü aser amshitsü anapronglaji kasa tongtipang lir.

Asenoki tekülak tiyazü mangatsüla. Arogo shia Tsüngrem O nung ratamatatsü osang angashir. Walok watemba yimsü osang, arasenba mapa indang angashir aser aikati Yisu masü item yimsü aser tesayuba kidang anioker. Lai tesayuba den mapetba sayatenya mapa indang parnoki angashi. Yisui itemji aitsür. Tiyazü tesayuba kübok lia iba jagi meraksatsür ta ashitsübaji tamakoktsü. Tangashir tamangji meraksayonga, pa mulungsentsübo menentsür. “Nisung kati pei teku nung mi bener, pa süoshi merongdoki lidi ma? Mesüra kati mijang tait ma nung jajar, pa tetsüng merongi lima?” (A.Shin 6:27-28). Tejangja telangzübaji “Masü” ta alitsü.

Kechi majung ibaji asenoki mangatsüla. Tanü lokti nung teraksa tulutibaji temulungsentsü menentsübaji lir. Memerükba osang azüngba, kaket azüngba, radio aser TV programme tamajung angaba aser ajiba, noksa tamajung reprangba aser meimchir sensaksem tamajung angaba ajanga teraksa adokdaksür. Ibai teti anga a aliba ajanga temenenji memeteti akümer. Aser ibaji dang lendong masü! Kodang asen mulungsentsüi otsü tamajung aser tebilemba tamajung shidangba agizükdir, asenoki mapang tajung mapang nung item jagi asenok arishir.

Asenoki asen mulungsentsü tamajung agi mesüngdaksütsüla. Takümüji kanga tatsü aser ibaji asoshi mapaji rongdak.

Asenoki Tsüngrem o ji kanga kümdanga angatsüla. Pa o agi asen mulungsentsü yimsatsüra asenoki Pa dang tali tashi angatsü; Tsüngremi bilemba asenoki bilemra, asenok Khrista mesükba nung melenshitsü aser asenok jakla raksatsüba nungi pilatsü.

reshikangshiba linükji North Korea lir (Open Doors’ 2024 World Watch List), iba sülen Somalia, Libya, Eritrea, Yemen, Nigeria, Pakistan, Sudan, Iran, Afghanistan aser India linüktem lir.

U.S. Commission on International Religious Freedom (USCIRF)-i 2024 küm linük aika “countries of particular concern” (CPC) nung züngoktsü benokogo, aser item linüktem rongnung Afghanistan, Azerbaijan, Burma, China, Cuba, Eritrea, India, Iran, Nicaragua, Nigeria, North Korea, Pakistan, Russia, Saudi Arabia, Tajikistan, Turkmenistan aser Vietnam densema lir.

Commission indang special watch list nung liba linüktemji Algeria, Egypt, Indonesia, Iraq, Kazakhstan, Kyrgyzstan, Malaysia, Sri Lanka, Syria, Turkey aser Uzbekistan lir.

International Christian Concern (ICC)-i ashiba agi, Marxism, Islam yimsü alia amangertem aser loktiliba nung nisung bendangshidangba kulitem ajanga Khristantem

reshikangshir.

Yaküm ACN UK-i London nung aliba St. George’s Cathedral nung Red Wednesday amongba mapang nung ACN UK’s “Courage to Be Christian” award agizükdang Margaret Attah-i 2022 küm June ita nung Owo, Nigeria nung lar Arogo amakba tatalokba lemsatepa liasü.

“Rev. putiri ‘tekülem tembanger, tesünep nung oang’ ta ashiba mapang nung mezüngbuba injang ola angashi. Ibaji ajanga Tenla kima prangpong amertem alibaji onoki meteta liasü. Kima parnok pezü liasü,” ta lai metetdaksü.

Par pezü Tenla ki telungi aitba sülen parnoki injang khaloktsü aser Tenla ki sabanglen bomb pokdaksü, ta lai ashi.

Bomb ajanga Attah-a tetsüng pokdoka liasü aser Arogo nung züngsem 41 asü. “Tai atokba nung ni amanger, anungji ni parnok dang tai tokogo,” ta lai metetdakja liasü.

AO OSHI ANGAZÜKDAK:
TANÜ ANGAZÜKTSÜBA OJANG



Taoi

(adv) apusotsü mapang (time of departure)
* Onok yimtak nungi taoi adianutem den salemtep.

Taoka

(adj) nepboka aluba (bend)
* Kidang atem tera taoka ir liasü.

OLONG PAITEP # 6957

1				2				3		4
5		6								
							7			
8										
										9
			10						11	
						12				13
14										
16										

TIPIEN

- 2. Auonung chiyongtsü asenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüing
- 3. Tenarong maten
- 4. A ___ g
- 6. Mopung apodoka
- ola adokdaksüba
- 9. Tongtipang tagtsü
- 10. Menungra bilem
- 11. Aiür
- 13. S ___ k
- 14. T ___ r

OLONG PAITEP # 6956 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem, 15. Tambu,
- 16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

NAI-A YA METETTER MA



Canada nunger azü meimer Mitchell Rudy-i azü 38 anir senzüba ajanga "most dogs walked simultaneously by an individual" otsü yangluogo. Arishi küm 38 tain Rudy-i Canadian charitable initiative BONK aser Korean K9 Rescue (KK9R) (South Korea) den külemi azü kümzüksü mapa inyaka arur.

Dibrugarh hospital nung mezüingbuba kidney transplant sütetogo



Dibrugarh, October 20, 2024 (Agencies): Assam kübok Dibrugarh nung hospital ka nung mezüingbuba kidney transplant sütetogo. Iba ya October 1, 2024 nü Apeksha Hospital nung agia liasü aser otsü tasen ka yanglu. Lanur ka dak tetsüi tenlaba kidney enoktsü aser iba ya Assam adena orr sen agiba dang nungi kanga agi dalangba nung agia liasü. Delhi nung telok kati teyari agüja Apeksha Hospital nung iba operation takok ngua agia liasü.

Nephrologist Dr. Dibya Jyoti Kalita-i aniba Renal Transplant team nung Dr. Nandita Jaiwal, Dr. Anand Jain, Dr. Mridu Plaban Borah, Dr. Safdar Hayat Hussain, Dr. Vikas Kumar Agarwal, Dr. Raja Roy, aser Dr. Abhinav Poddar nunger dena liasü. "Asenoki nisung nem advanced medical treatments agütsüsüla. Iba mapa ya northeast nung mera tulu ka agiba lir" ta Dr. Kalita-i ashi. Apeksha Hospital nung active partner Dr. Ashok Kumar

Agarwal-ia "asenoki jenjang dalang agi healthcare agütsüsü atema alizüing ayutsüla" ta ashi. "Onok lanur doctor tem Assam-i meyipa arudaktsünür aser pei pei talidak healthcare renloka odaktsünür. Onoki akokba tashi nüngdakba infrastructure & support agütsüsü" ta pai ashi. Dibrugarh nung kidney transplant takok ngua agitetba aser maparen tuluba akümstsü sentongtem ajanga tarutsü nung advanced medical care tongti tesem ka akümstsü.

Mizoram nung Bhairabi-Sairang railway project tatemleni arur

Guwahati, October 20, 2024 (Agencies): Mizoram yimtiba Aizawl den linüki sendakteptsüba Bhairabi-Sairang railway line project joko tatemleni arur. Bhairabi aser Sairang tsüngda kilometer 51.38 railway line tasen ya section pezü- Bhairabi-Hortoki, Hortoki-Kawnpui, Kawnpui-Mualkhang aser Mualkhang-

Sairang lemsa lir. Kilometer 17.38 talang Bhairabi-Hortoki section renemogo aser July 2024 nung lapokba sülen taküm August nungi train services senzür. Iba mapatong ya renemba sülen Mizoram nunger atema communication aser commerce nung temelenshi tulu bentsür arutsü.

Bhairabi-Sairang railway line project nung tunnels 48 tashi lir aser metre 12,853 tunnels nungi metres 12,807 yangluogo. Bhairabi-Sairang railway line project nung major bridges 55 aser minor bridges 87 lir. Iba mapatong nung railway stations pezü- Hortoki, Kawnpui, Mualkhang aser Sairang lapoktsü.

Assam CM Sarma-i Guwahati nung Mission Basundhara 3.0 tenzüksü



Guwahati, October 20, 2024 (Agencies): Assam Chief Minister Himanta Biswa Sarma-i October 20, 2024 nü Srimanta Sankardeva Kalakshetra nung Mission Basundhara 3.0 tenzüksüogo. Iba ajanga Assam nung ali temeten atema o atsüteptsü tenzükogo kechiyong iba mapa ajanga lisopur nem ali temeten agütsüsü meranger. "Opposition political parties, Congress aser AIUDF-i onok

lutsür saka onoki parnok dang Mission Basundhara ya state nung lisopur nem ali temeten agütsüsüba lir ta shiogo" ta CM Sarma-i ashi. Sorkari ali temeten agütsüba maparen den külemi Digidoc ta ser non-registrable aser optionally registrable documents atema digital directory ka tenzüksüogo. Mission Basundhara 3.0 ya mezüing October 2021 nung tenzükua liasü. Iba mapa den külemi state sorkarisa Chief

Minister's Atmanirbhar Asom Abhijan (CMAAA) ta ser entrepreneurship support program tuluba kümogo. CMAAA 2.0 ya Hokolbarnü tenzükua liasü aser iba schema ajanga entrepreneurs 75,000 nem senotsü teyari agütsüsü. Iba scheme atema shimtetba beneficiary temi professional course categories atema Rs 5 lakhs aser non-professional courses atema Rs 2 lakhs angutsü.

OFFICE OF THE YAONGYIMSEN SENSO MONGDANG

P.O. : Changtongya - 798613 Dist : Mokochung, Nagaland

31 BUBAYAONGYIMSEN SENSO MONGDANG NUNG LEMTETBA YAMAI SANGDONGER

Dated : 11-10-2024 anogo nung Senso Mongdangi Chümoukedima 1989 telok nem anogo 7 (seven days) tsüingda nung koba ken-o medembangi ali ibaji tembangtsü Senso-i latettsü. Saka parnoki tashi manga, anungji item nisungtem ya Dated : 19-10-2024 anogo nungi pa aser par kibong Yaongyimsen Senso nungi jendoker.

Tenüngtem:

Table with 3 columns: SL. No., NAME, REMARKS. Lists 42 names and their corresponding remarks.

S. Wate (SAKOWATI LKR) President YSM

Nokchi Jamir (NOKCHI JAMIR) Vice President YSM

(S.BENDANGMEREN IMSONG) Asst. General Secy. YSM

Indonesia Tir Prabowo-i ochimashi inyakyim anema raratsü nangzük

Jakarta, Mongputeni/October 20 (Agencies): Prabowo Subianto, alima nung nütsünyongsük timtiba aliba linük pezübuba Indonesia indang tir mapa abentsü atema Deobarnü tenangzüktepba agiogo aser pai ochi mashi inyakyim anema raratsü tenangzükba agütsüogo. Arishi küm73 tain taoba mapang general aser defence minister ya tir mapa atema Deobarnü parliament nung tenangzüktepba agiogo. Pai populist lenir Joko "Jokowi" Widodo melenogo. Prabowo shiba military commander aliba mapang tangar temeden anema inyaksangshiba atema aitsür lir, pai February ita election agiba kokogo aser linük nung nütsünyongsük million 280 aliba lenitsü atema nüburtemi pa shimogo. Tir mapa agizükba sülen mezüngbuba o jembiba mapang pai Indonesia ya tangar dak memetaloki aliba linük ka

kümdaktsütsü tenangzükba agütsüogo. Pa ya linük tir tibuba lir. Pai ashiba agi, pai democracy nung liner saka ibaji "polite" asütsüla ta ashi. "Tebilemba balala ya tsükchitep makai adoktsüla aser kati ka mesempatepi raratsüla," ta pai ashi. Prabowo, shibai taoba mapang tir mapa atema asemben tashi toktepogo, paisa pa ya Indonesia nunger ajak indang tir asütsü ta tenangzükba agütsüba den nüburtem dang linük nung tebilemstü balala alibatem bentettsü atema pa nem teyari agütsütsü ayongzükba liasü. "Nnüburtem kodang sadema lirdir idangjiang linük kaji kecha tetsükdaktsü makai sadem sadema aliba linük ka ta asenoki angatettsüla," ta Prabowo-i ashi. "Nüburtem tetsüba, sensaktia, ya tzüraba, mashimalu, tekübokba jenjang nung toktsüba tekangshi nungi pila toktsütsüla," ta pai ashi.

Prabowo tenangzüktepba agiba sentong nung pa den toktepsang Widodo'er jabaso tambusang arishi küm 37 tain Gibran Rakabuming-ia shilem agia liasü. Prabowo-i taküm February 14 nü agiba tir election ya vote shilem 60 shi agi koka liasü aser iba sülen ita teku tashi party aser nisung balala den tesendaktep balala yanglua aruogo. Tir mapa agizüka o jembiba sülen Prabowo-i baseball cap ka semer pa indang gari sunroof lapoker presidential palace-i aoba mapang nüburtem dang teka ayiplokja liasü. Pa gari nung mener aoba mapang pa pusemer meyirejang aikati linük wako ayiplokja pa agizüka liasü. China tir Xi Jinping-ia, Prabowo nem tenüngsang agütsüba osang yokogo. Xi-i ashiba agi, pai Indonesia lenir tasenba den tesendaktep tajung ayutsü, ta state broadcaster CCTV sangdong ka ajanga metetdaktsü.

SANGDONGER

Chuchuyimpang Mongoya Prayer Garden nung 25th - 27th October, 2024, anogo asem (3), Healing Crusade sentong agitsü renema lir. Anungji nüburt shirnok shi aser Tanela nung taneptsü aginüa ali, temulunger ajak arua iba sentong nung Tsüngremer temoatsü agitsü pelashishia jaoker.

Mapang telemsa

Aonung - 5:00 PM; Anepdang - 9:00 A.M Tongtepratepdak : 9856486841 / 8258802047

Israel-i northern Gaza amakdang nisung 73 tepset

Gaza City, Mongputeni/Oct. 20 (Agencies): Israel-i Gaza north tsütsü Beit Lahia yimti amakba nung tetsür aser tanurtem densema nisung 73 asü, ta yangji aliba Hamas ketdangsur temi ashi. Honibar aonung menur bomb pokloktsüba nung aika yiru aser aika tang tashi ki poksaba agi abenbanger lir, ta ashir. Israel-i asü-amaba osangtem reprangtar ta ashi aser Hamas ketdangsur temi sangdongba ya kanga agi tali aser mitkar ket nung aliba osang den mapet ta ashir. Deobarnep southern Lebanon aser Beirut south tsütsü maneni raraba osang lir, kong yimti azüklen mokozi alonga aliba nguogo. Tesüiba anogo air force ajanga Gaza aser Lebanon nung "terrorist targets 175" amak, ta Israel-i ashir. Hamas meyong government media office ajanga ashiba agi, Honibar aonung Beit Lahia nung bomb pokloktsüba agi nisung jenti adenshia aliba tesem ka nung kongshi aser nisung 73 asü, aser kasaji Gaza indang Hamas meyong civil defence agency-ia ashi. Iba mapang residential complex ka aoyi kuma samatsü, ta Palestine nunger news agency Wafa ajanga ashir. Region nung tang communications aser internet services majungba ajanga Beit Lahia nung nüburtem kumzükba maparen nung tetsükdaktsü ajurua lir, ta Gaza health ketdangsur temi ashi. Kasa yimti nung aliba Indonesian Hospital nung Israel sepaitemi injang kanga sashia khaloktsüba osang sangdonger ghonda ishika lir tang tesüsa iba osang ya sangdonger alitsü. Israel Defense Forces (IDF) ajanga osangbener dang parnoki "Hamas terror target" ka amak aser civilian nem timtem magütsütsü asoshi akoktashi inyaktar, ta shia liasü. Hamas teloktem tanaben madenshidaktsütsü meranga October ita tetenzüklen nungi asendenshir northern Gaza nung Israaqel mitkari makyonga arur. Talisa Israel sepaitemi nütsüng sashia aliba Jabalia area lungbanger bomb poklokja liasü, kong urban refugee camp dena lir, aser Hokulbarnü menur amakba nung nisung 33 tepset ta ashir. Humanitarian groups temi hopta ishika iba tesemi teyari bener moteter ta shia lir. Israel-i asadanga nungya Gaza nem teyari agütsüba maparen ajak

tsükdaka lir, ta shia liasü. UN nung humanitarian ketdangsur Joyce Msuya-i Honibarnü ashiba agi, Palestine nunger northern Gaza nung tepang agi ashitsü makok tim atemer aser item tashiyim mapa anentsüla. Israel-ibo Gaza telungi humanitarian aid bener aiba menokdang ta ashir saka US-i parnok dang teyari tali agütsütsüla, aji mesüra America nungeri mitkar nem teyari agütsüba kar anentsü ta ashir. Kasa mapang Israel-i Honibarnü Beirut nung tayimtsü amshia tesem ter dak tema nung amak, koba hopta ka dak tema arudang Lebanon yimtiba nung amakba tesashitiba alitsü. Teraksatsüba aser asü-amaba tang tashi asadanger, saka yimti south tsütsü multi-storey building kabo aoyi kuma raksatsüogo. Israel mitkari Dahieh nung Hezbollah indang nok-nü ayuba tesem aser intelligence headquarters command centre amak ta ashir. Israel mitkari yangji aliba kiyong ana nungi nüburtem tangsa ainshitsü totuyuba agütsüba sülena Deobarnem Beirut south tsütsülen mokozi alonga angu. Hezbollah-ia Honibarnü Israel north tsütsü maneni rockets khalokja liasü, aser Israel mitkaria projectiles (rockets) 200 shi khaloktsü ta ashir. Nisung ka gari nung mela aliba asü, ta Israel indang medical service Magen David Adom-i ashi. Honibarnüsa par kidang drone amshia pa tepsettsü merang, ta Israel Ato Kilonser Benjamin Netanyahu-i ashi. Iba lendong atalokba mapang Netanyahu aser pa kinungtsü kidang meliasü aser nisung shinga meyiru. Taoba küm October ita rara tenzükler tang tashinung Gaza nung nisung 42,519 tepsetogo aser meyirijang aika yirua lir, ta Hamas meyong ketdangsur temi ashir. Hamas-i October 7, 2023 nü Israel amakdang nisung 1,200 shi tepsetba den ano nisung 251 pua bener Gaza-i ao. Israel-i Hamas samatsütsü nangzükba lir. Hopta tetenzüklen Gaza nung Hamas lenir Yahya Sinwar tepsetba ajanga rara atemtsü südi ta nüburtem mulungjang nung teimla liasü. Ajisüaika iba telok indang deputy leader-i iba ya ajanga Hamasa tashi itshitsü aser Gaza nungi Israel nunger mainshi tashi pua aliba Israel nunger mechioktsü ta ashir.

HI-i Germany den asayatsü atema asayar 22 shimogo

Mongputeni/October 20, 2024 (Agencies): Hockey India-i Deobarnü World Championship tesüsabuba koker aliba Germany team den New Delhi nung asayatsü atema India team nung asayar 22 tenüng sangdongogo.

Hulunbuir, China nung Asian Champions Trophy akokba sülen India team October 23 aser 24 nü Major Dhyan Chand National Stadium den Germany den asaya ana asayatsü. Asian Champions Trophy ya 2011 küm tenzük aser India team-i tang tashi nung iba asayamung timbaben koka pongubenbuba kokogo.

India aser Germany na Bilateral Hockey Series asayaba ya linük yimtiba nung international hockey asaya tenzükshiba ka asütsü. India team ya Harmanpreet Singh lenisüba nung asayatsü aser vice-captain ji Vivek Sagar

Prasad asütsü. Team nung midfielder Hardik Singh densema mali, kechiyong pa Paris nung Olympics asayaba mapang yiruba tang tashi taneptsü monguteti lir.

Iba asayamung nung Rajinder Singh aser Aditya Arjun Lagate na mezüngbuba India team nungi asayaba angutsü.

Asayartem shimba indang jembiba mapang Chief Coach Craig Fulton-i ashiba agi, "Germany den taruba hopta linük yimtiba nung asayatsü atema onok kanga yongya atadar. Kümtem tsüngda India aser Germany na kanga toktepba arudar aser onok New Delhi nung asayatsü atema yongya atadar. Onoki shimba team nung asayar tejen aser tasen naprongla lir aser asayartem aika Paris Olympics nung bronze medal anguba team nung densema liasü. Iba asayamung nung Rajinder aser

Aditya na tang mezüngbuba team nungi asayatsü. Tenati training camp nung kanga junga asayaago aser tena tang mezüngbuba India team nungi asayatsü atema onoka yonga atar."

Team Bengaluru nungi Deobarnü New Delhi tongogo.

India Team:

Goalkeepers: Krishan Bahadur Pathak, Suraj Karkera.

Defenders: Jarmanpreet Singh, Amit Rohidas, Harmanpreet Singh (C), Varun Kumar, Sanjay, Sumit, Nilam Sanjeep Xess.

Midfielders: Manpreet Singh, Vivek Sagar Prasad (VC), Vishnu Kant Singh, Nilakanta Sharma, Shamsher Singh, Mohd. Raheel Mouseen, Rajinder Singh.

Forwards: Mandeep Singh, Abhishek, Sukhjeet Singh, Aditya Arjun Lalage, Dilpreet Singh, Shilanaanda Lakra.

New Zealand den tanungba Test asaya atema Washington shimogo



Washington Sundar

New Delhi, Mongputeni/October 20 (Agencies): New Zealand den tanabuba aser tasembuba Test asaya atema Deobarnü India team nung allrounder Washington Sundar züngoksemogo.

"Tanabuba Test masaya tsüngda Washington Sundar India team den Pune nung longjemtsü," ta BCCI sangdong ka ajanga metetdaksü.

Sundar tang Ranji Trophy nung Tamil Nadu nungi Delhi nung asayaba mapang ka lir. Pai mezüngbuba innings nung run 152 yanglu aser Deobarnü wicket ana agiogo.

Arishi küm 25 tain asayar shiba iba ita tetenzüklen Bangladesh den T20I asayamung nung shilem agia liasü, pa 2021 küm Border-Gavaskar Trophy nung Australia den mezüngbuba asayaba sülen tang tashi nung Test pezü nung asayar lir.

Pa Test asaya nung

tesüsabuba 2021 kümssa England den Ahmedabad nung asayaba mapang asaya liasü. Test pezü asayaba mapang Sundar-i run 265 yanglu aser wicket trok agir lir.

Ravichandran Ashwin, Ravindra Jadeja, aser Kuldeep Yadav nunger ajak team nung züngoksema lir asünung India team-i tasa melenshira Sundar-i tanabuba Test nung parnok asem rongnung ka melentsü imlar. Tanabuba test ya October 24 nü tenzüktsü.

New Zealand den tanabuba test atema India team:

Rohit Sharma (C), Jasprit Bumrah (VC), Yashasvi Jaiswal, Shubman Gill, Virat Kohli, KL Rahul, Sarfaraz Khan, Rishabh Pant (WK), Dhruv Jurel (WK), Ravichandran Ashwin, Ravindra Jadeja, Axar Patel, Kuldeep Yadav, Mohd. Siraj, Akash Deep, Washington Sundar.

Küm 36 sülen NZ-i India nung Test asaya ka kokogo



Mongputeni/October 20, 2024 (Agencies): India aser New Zealand na mezüngbuba Test asaya Deobarnü NZ-i wicket ti agi kokogo.

Küm 36 sülen tang mezüngbuba India nung Test asaya ka akokba sülen New Zealand captain Tom Latham-i ashiba agi, iba asaya akokba ya parnok asoshi nümadangtsü mapang ka lir.

Deobarnü tatembangbuba anogo asaya akoktsü atema run 107 nüngdaka liasü, ajisüaka Latham bo run ka danga meyangu tsüngda Jasprit Bumrah-i out süja dressing room nungi dang asaya repranga liasü.

Ajisüaka Bengaluru nung mezüngbuba Test asaya tatembangbuba anogo Will Young aser Rachin Ravindra nati kanga süngjema asaya-a tenati New Zealand team takok dangi ania liasü. Parnoki iba

asaya wicket ti agi koka liasü. Iba asaya akokba sülen Test asaya asem asayatsü aliba nung New Zealand 1-0 agi tejakdang kümogo.

New Zealand team-i taoba mapang India team 1969 küm Nagpur nung akok aser 1988 küm Mumbai nung koka liasü.

Latham-i aniba team yagi mezüngbuba anogo India team nem run 46 dang yangludaksür asaya ajak out sütsüba sülen parnok jenjang kanga junga yanglua liasü.

Iba ita tetenzüklen Tim Southee ket nungi captain mapa agizükba sülen arishi küm 32 tain Latham-i anir par team-i asaya kanga junga koktetogo.

Kasa mapang nung India captain Rohit Sharma-ia par team-i tanabuba innings nung kanga junga asayatetba atema tenüngsang jembiba liasü.

"Onoki run 46 dang yanglur asayar ajak out süatoktsü tabo

mebilemi liasü aser iba atema New Zealand nem tenüngsang agütsütsü tetemsü. Iba ajanga onok jenjang mejungi aküm, ajisüaka iba amala ya ataloker," ta pai ashi.

Tanabuba innings nung Sarfaraz Khan-i run 150 aser wicketkeeper Rishabh Pant-i run 99 yanglua India team-i run 462 yanglua liasü.

Tatembangbuba anogo Bumrah-i tanabuba ball aonba mapang Latham out sütsüba sülen team nem timla agütsü aser iba sülen paisa Devon Conway out sütsü saka iba sülen India team-i tanga asayar ka danga out mesütsütet.

Mezüngbuba innings nung century yanglusan Ravindra-i tanabuba innings nunga out mesüi run 39 yanglu aser pa nem player of the match naroküm agütsü. Kasa mapang nung Young-ia run 48 yanglua liasü.

Kadhe-Rithvik nati mezüngbuba ATP Tour title ka benogo

Mongputeni/October 20, 2024 (Agencies): Deobarnü Almaty, Kazakhstan nung ATP 250 Series asayamung ka akokba sülen Arjun Kadhe aser Rithvik Choudary nati tang mezüngbuba Tour title ka benogo.

Kadhe aser Choudary nati super tiebreak nung match point pongu tashi kümzüka Colombia nunger Nicolas Barrientos aser Tunisia nunger Skander Mansouri na 3-6, 7-6 (3), 14-12 agi koka liasü.

"Asaya tatemlen kanga jangrademtsüka liasü. Künati kanga meranga asayaago. Tongtibang mapang nung künati kanga meranga asayaba ajanga takok nguogo. Ni tang kechi bilemerar memetet ni tetama nung lir," ta Choudary-i ashi, shiba world doubles ranking nung top 100-i ia tang 85buba nung lir.

Kasa mapang nung Kadhe-i, "ni tang tashi mesüngjemteti lir. Tatembangbuba point kodang tembang aji ni mejangja aser second asemshi lir külenang ni

jangja liasü. Ni kü indang partner, team aser sponsor tem dang kanga pelar," ta ashi. Pa ATP rankings nung 77bubai tuogo.

Barrientos aser Mansouri nati US nungi top seeds Nathaniel Lammons aser Jackson Withrow na tanabuba round nung aser semi nung Argentina nunger fourth seeds Sriram Balaji aser Guido Andreozzi na akokba sülen final tonga liasü.

Deobarnü asaya nunga tenati ace (10) timba ao aser set asaya nung break point khen danga majangshi liasü.

Mezüngbuba set nung Kadhe aser Rithvik na indang serve break süa tena 0-2 agi tesülen liasü. Ajisüaka iba asaya nungbo tena indang serve break asütsüsa khen danga majangshi.

India nunger tarep yagi tanabuba set nunga kanga meranga asaya aser tenati iba set akokba sülen super tiebreak kanga toktepba asayaba sülen Kadhe aser Choudary nati 14-12 agi koka liasü.

BILEMDANGANG

"Nai kechi inyakteter aji bendanga agüja inyakang."